



25. oktober 2011

UKA 2011/36

Inatsisartut suleriaasianni kapitali 11 § 36 naapertorlugu apeqquteqaat aallavigalugu oqallinnissamut siunnersuut imaattoq matumuuna saqqummiupparput:

Ukiup sinnerani aalisartut qaleralinnik saarullinnillu inuutissarsiuteqartut pisassaaruttut, kiisalu aalisakkerivinni qaleralinnik saarullinnillu nioqutissiorfiusuni sulisut suliasaaruttut, isertitaarutivinneq pissutigalugu inuuniarnermikkut atugarliorluinnalertussat pillugit aaqqiissutaasinnaasunik sunik iliuuseqarsinnaaneq pillugu apeqquteqaat aallavigalugu oqallinnissamik siunnersuut.

(Siumup Inatsisartuni ilaasortaatigai)

Tuungavilersuut:

Nunatsinni pissutsit ilungersunarluinnartumut killinneranni, ajorluinnartumik pisoqannginnerani partiit tamaasa Siumumit suleqatiseeraassi aaqqiissutissamik ikioqatigiilluta iliuuseqartariaqaratta!

Siumumi isumaqarluinnarpugut innuttaasunut sullissisussatut qinigaasugut tamatta pinngitsoqarata pisussaaffeqartugut pissutsit ajorluinnartumut inissilernerini iliuuseqassalluta.

Aalisartut saarullittassaqaanngillat, qaleralittassaqaanngillat, piniartorpassuit ameersinnaanngillat, sulisartorpassuit aalisakkerivinni sulisut suliasaarunneri pissutaalluni angerlartinneqariinngikkunik ulluni qaninnerni angerlatinneqassapput.

Naatumik oqaatigalugu inuppassuit ukiup sinnerani, qaammatini marlunni aningaasarsiorunnaassapput, ilaquttaminnik pilersuisinnaajunnaassapput, meeqqamik atisassarsinissaannut nerisassarsinissaannullu akissaarutissapput, akiligassaminnut assigiinngitsunut akiliisinnaajunnaassapput – inuunerat unittuussaaq!

Inuppassuit, angutit, arnat, angajoqqaarpassuillu allamik periarfissaarullutik kommunimut saaffiginnittariaqassapput ikioqqullutik.

Inatsisit malillugit kommunit pisussaaffeqaramik pinngitsoornatik ikiuisussaapput, tamannalu kommuninut ajornartorsioreeqisunut imaannaanngitsumik nanertuutaasussaavoq, allaallumi aningaasatigut ajalusoorluinnarnerinik kinguneqarsinnaalluni. Tamannalu innuttaasunut tamarluinnarnut eqquiinnarani nunatsinnulli ajorluinnartumik aamma kinguneqartussaavoq.

Taamaattumik Siumumiit apeqquteqaat aallaavigalugu Inatsisartuni oqallinnissamik siunnersuuteqarpugut.

Ajornartorsiutip pineqartup imaannanngitsup ilaqutariippassuarnik artukkiisussap qaangeriarnissaanut Siumumit isumaqarpugut periarfissaalluartoq Inatsisartut Naalakkersuisunut ukiup 2011 sinnerani sinerissap qanittuani saarullittassat tons-inik ukiup sinneranut naammattunik ilaneqarnissaannik aalajangiinissaannik, kiisalu qaleralittassat aqutsisoqarfinni assigiinngitsuni tamani tons-inik ukiup sinneranut naammattunik ilaneqarnissaannik aalajangiinissaannik peqqusippata.



SIUMUT INATSISARTUNI ILAASORTAATITAT

Pisasseeqqittoqanngippat aalisartut pisassaruttut sulisartullu suliffissaaruttut kisimik eqqornerlunneqarnaviangillat, tamatta eqqugaassaagut, kommunit aningaasaqarnerat ajalusuusaaq – nunarput ajalusuusaaq!

Neriuppugut apeqquteqaat aallaavigalugu oqallinnissamik siunnersuuteqarnitsinni ajornartorsiutit annertuut tikkuakkavut pillugit iliuuseqarnissamik Inatsisartuni ilaasortaasugut ataatsimoorfigisatsinnik isumaqatigiissuteqarnermik oqallinnerput kinguneqarumaartoq.